

FAMILIE M. STEINER



Letschi hän mir glitte, unter grosse Quale
Mir hätte wieder mol sone Rächnig miesse zahle
S`Gäld isch grad nid umme wäge falscher Budgetierig
Jetzt schigge mir die Rächnig halt - an d`Basler Stadtregerig

Unseri Natispieler, die dien hüt nümme singe
Schiins kunnts dervo, well nur no Immigrante ummespringe
An die alte Zyte dängge mir mit Wehmuet dra
Do hän mir halt die Yakins - und dä Türkilmaz no ka

D`SVP die wot uns schütze vor de Imigrante
Vor de Linke, Griene, Freiheitskämpfer, Demonstrante
Ob d`USA als Wältbolizei uns do öbbis nützt
Und s`schöne Schwizerland mol vor dr SVP beschützt

D`Frau Meier uss em Parterre, het jetzt au e Burkini
Dr Glaube dä isch Schuld, sie glaubt dass Sie so schlanker schiini
Im Glaube söll me frei si, dä looht sich nid lo mässe
Nur sotsch vor luter Glaube - sälber Dängge nid vergässe!

D`Mamme seit: „im Fraueli do dien si öfter striite“
Das het jo miesse ko, imne Schwimmbad voller Gritte
Mir hoffe jetzt das Fraueli das macht nid wirklich zue
Denn sinn d`Fraue im Fraueli - hän d` Männer ihri Rueh!

Als Notfall muess dr Opi, ins Bruederholzspital
Mir wüsses nit genau isch das jetzt guet oder fatal
D`Schwöschter drait am Glücksrad schreit: „ihr händ soebe gwunne!“
E Doggderkoffer für dehai - dr Spezialischt dä isch nümme umme

Dr Terminator Schwarzenegger und dr Fifa Blatter
Die wärde jo im Alter au nid wirklich no viel glatter
Was die Zwei so biete, het doch absolut kei Zwäck
Und trotzdam heisst bi Beidne immer wieder I'll be back

Dr Sohn kunnt uss dr Schuel heim und frogt: „hän dir das scho ghört?“
Mir sitze drumm an Ässtisch, är dönt doch rächt verstört
E Schüeleruniform sölls Gä und zwar: „jetzt mien ihr loose!“
Kombiniert uss Schwingerhemli - und ere Trainerhoose

Die Mittler Brugg in Basel - isch schiins e bitzli z`dieff
Well me hützutags mit grössere Schiffli fahre miess
Im Fuessball seht me sone Phänomen au immer wieder
Dört isch bi gwüsse Fans - s`Niveau oft au zimmi niedr

In Basel herrscht e Bombestimmig dasch e Katastrophe
Tschihadischde sins nit gsi nur zwei so doofi Goofe
Wär entschärft dä Knaller - hän Si no beroote
Nämme mir für dä Job lieber Zürcher oder Schwoobe

Bi GC und bim FCZ isch d`Situation extrem
Mir verstöhns als Zürcher bisch per se scho e Problem
D`Rettig für die Zwei wär schiins d`Fusion in höchster Not
Worum denn fusioniere - wens ganz ohni Zürcher goht!

Dä Väs dä isch nit glatt, aber es isch wöhr
Immer wieder s Gliiche Johr für Johr für Johr für Johr
Es isch zwar no biz frieh, heds am Sunntig aber gseh
Worum denn öbbis Neus - Schwizer Meischer FCB!

Bim Basellandkulturbudget wird gspart es isch zem hyyle
Drumm isch dä Helge glai - und dr Väs het nur zwei Ziile.